



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

**Jalandhar nung
AAP lenir ka khaset**

**Pakistan nung mosque ka anasa
nisung 31 pokset, 169 yiru**



VOL. XXIII ISSUE NO. 115 (ADOK 115) DIMAPUR KÜPTOKNÜ (SATURDAY) TSÜKLAI (FEBRUARY) 07, 2026 ₹ 5.00

MP Supongmeren-i MHA den Dimapur Airport onük lemsatep

Dimapur, February 6, 2026 (TYO): Assam Rifles Training Centre and School (ARTC&S)-i Dimapur Airport ali atsünga agia aliba ajanga terenlok mapa meinyakteter ta Lok Sabha MP S. Supongmeren Jamir-i Ministry of Home Affairs (MHA) dangi shidi ka zülüogo.

February 6, 2026 nü MP Supongmeren-i MHA dang ali kibur ken o bentettsü aser tekaratiba nung ali meyipa agütsütsü shiogo.

Küm 10 tema ali meyipa magütsüba ajanga terenlok aser connectivity maparen nung tetsükdaktsü ajurua arur ta pai ashi.

Dimapur Airport ya Nagaland asoshi kanga tongtipang lir aser iba ajanga anogoshia connectivity, emergency services agütsüba den rongsenketzung renloker. Ajisüaka Assam Rifles-i airport ali tulu ka atsünga agia aliba ajanga timtem ajurur. Iba ajanga airport infrastructure ulushitsü merangaka tamakok dang ngua arur ta MP Supongmeren-i ashi.

Acre 392.72 tasazük Dimapur Airfield ya Indian Air Force-i September 1, 1987 nü National Airports Authority (tang Airports Authority of India) ket nung agütsü. Iba ali agütsüba ya formal reports, Defence Estates Officer nungi osang metetpelaba aser India sorkar kulikakettem ajanga pusemer. Military Land Register nungia kulitem densema records ajanga AAI ket nung ali

agütsüba metener, ta MP Supongmeren-i MHA dang ashi.

February 29, 2024 nü Joint Survey and Verification Report ajanga tang aliba tensa jangjatsüogo. AAI ket nung agütsüba ali acre 392.72 nungi acre 148.58 tashi Assam Rifles ARTC&S Dimapur ket nung lir. Iba ajanga airport ulushitsüba nung tetsükdaktsü tulutiba ajurur ta pai metetdaktsü.

1960s tetenzüklen Dimapur Airfield anasa Assam Rifles nem ali agütsübaji khen atema (temporary basis) dang liasü. Maneni, Assam Rifles nem training establishments lapoktsü atema Nagaland kübok tanga alitem agütsüogo ta MP Supongmeren-isa ashi.

"Airports Authority of India (AAI)-i Nagaland sorkar nem master plans agütsüogo aser item nung terminal building tasen, parking bays tuluba aser airport facilities tajungba akümtsüba shia lir. Ajisüaka item ajakji Assam Rifles ket nung aliba ali meyipa angu nung dang inyaka otettsü, anungji iba ken o mebentet tashi Dimapur Airport tajungba küma meyanglutettsü" ta paisa MHA dang shiogo.

"Ministry of Home Affairs-i AAI ket nung ali acre 148.58 tangsa meyipa agütsütsü atema tetuyuba agütsütsü mepishir. Iba temepishiba ya records nung ajemdaker agütsür aser yamaji asü nung dang Dimapur Airport expansion aser modernization sütettsü" ta MP Supongmeren-isa ashi.

Minister Jacob Zhimomi-i Union Budget 2026-27 tenüing asanger

Dimapur, February 6, 2026 (TYO): "Union Budget 2026-27 ya 2047 tashi nung Viksit Bharat akümtsü asoshi mangdang aketba asalentong ka lir" ta PHED and Cooperation Minister Jacob Zhimomi-i ashi.

"Union Minister of Finance Nirmala Sitharaman-i sayaba Budget ajanga Prime Minister Narendra Modi mangdang sayur. Bilemba masü mapa, o masü temelenshi aser teshimtepür masü nübor asoshi mangdang ayuba sayur. India-i 1947 nung political freedom angu saka Atmanirbhar Bharat movement ajanga dang chichiba nüjiso angutsü" ta Jacob-i ashi.

"Sahakar Se Samriddhi initiative ajanga tang nungi cooperative society tem startups ama agizüktü. Nagaland nung ali

ya kanga tongtipang lir aser iba nung ajemdaker local startups tenzüktü akok. Sorkari village council level nung micro-management nung temulung agütsür aser iba ya nisung shiai terenlok angutsü mechi nung lir" ta paisa ashi.

"Taküm Budget ya Yuva Shakti nung amendaka lir aser iba ya India lanurtem skilling aser up-skilling atema lir. Budget ajanga Northeast ya India nung organic capital kümdaktsünür aser biodiversity takar ajungketa tourism sector tajungba kümdaktsünür" ta Minister Jacob-isa ashi.

State-i nüngdakbatem NITI Aayog ajanga inyaker aser linük rongsenketzung renlokba nung Nagaland-ia tongti shilem agitsü amanger, ta paisa ashi.

ANATG 2015 batch tesayurtemi lungkak aitba ulushir



Kohima, February 6, 2026 (TYO): All Nagaland Adhoc Teachers Group (ANATG) 2015 batch-i Hokolbar nungi Kohima nung lungkak aitba ulushiogo.

Onoki "2015 batch" ta amshir kechiyong iba küm tesayur 1166 tashi regularize asütsü temsüa aküm. Onok züngsemtem rongnung junior-most ji December 2012 nung shimba liasü ta ANATG Core Committee member Lhovito Sheqi-i ashi.

"Tesayurtemi Kohima nung tesüiba anogo asemnü tashi mener lungkak aita aru. February 4 nü NSF Solidarity Park nung ola madoki mener lungkak ait aser idangji züngsemtem telung nung sensaksem aser lokti senden ka amen" ta Sheqi-i ashi.

"February 4 aser 5 anogotem onoki School Education Department den olemtep anaben amen. Brihostibarnü onoki Screening Committee nung Chairman den ajurutepa regularization indang jembi saka tajung kecha melii dang tembang" ta paisa ashi.

Züngsemtem tsüngda olemtepa bangzüngtem renemba sülen onoki NSF Solidarity Park nungi Secretariat junction tashi yimdong süa timi lungkak aita jajatsü lemtet.

Ajisüaka, lungkak aiter kari tejashi nung masüba mapa kar

inyak saka police, district administration, aser ANATG ketdangpurtemi tensaji azüoka liasü ta Sheqi-isa ashi.

Onok nem küm 14 nungi 15 tashi service regularization memelai arur aser iba jagi züngsem kari tejashi nung meinyaktsü inyakogo ta paisa shisem.

"ANATG 2015 batch-i 2018 nung timi lungkak aita liasü aser iba sülen 2022 nunga lungkak ait. 2022 nung Nagaland sorkar aser ANATG 2015 batch tsüngda High-Powered Committee (HPC) agreement ka nung sign sütepa liasü. Iba tenangzüktep nung anogo 15 tsüngda HPC tentettsü aser ita trok tsüngda parnoki osang agütsür December 2023 tashi nungbo ken o angatetteptsü nangzüktepa liasü" ta ANATG Core Committee member Sheqi-i ashi.

Iba tenangzüktep nung jangjajanga lateta liaka 2023 küm osang tajung kecha maliasü aser 2024 o 2025 kümtem dang bangzüng kecha melii dang süidaktsüogo ta pai ashi.

"Iba jagi tesayurtemi nungnangaka yimdong nung lungkak aittsüsa aküm. Onoki Hokolbarnep mener lungkak aittsü aser core committee ka ajanga sorkar dangi memorandum ka zülutsü sentong

liasü saka onok Secretariat telungi maitdaktsü" ta Sheqi-isa metetdaktsü.

"Onoki Secretariat telungi aitsü aser shidi agütsütsü mepishi saka ibaji magizük. Sorkari dang lemtet tajung ka agütsüra onoki olemteptsü mulunga lir" ta paisa ashi.

Tesayurtemi government norms nung aliba ama suitability tests agütsüogo, kulikakettem jangjaio aser 2017 suitability test nung ajemdaker 2018 küm lungkak aitba sülen scale pay agütsütsü tenzüka ta Sheqi-isa metetdaktsü.

"Sorkari tesüiba nung 2024 küm agütsüba Office Memorandum agizükogo aser iba sülen department aika nung ad hoc employees regularize süogo saka tesayurtembo regularize masür" ta paisa ashi.

Personnel and Administrative Reforms (PNR) department ket nung nüngdakba kulikakettem agütsüogo ta Department-i onok shiogo. Ajisüaka mapang balala nung additional documentation meshiogo aser department tem tsüngda kati ka tai tongloktsüteper ta paisa metetdaktsü.

"Sorkari lemtet ka magira onoki akhangba asoshi telangzüba mangu tashi maneni lungkak aittsü" ta Sheqi-isa ashi.

Manipur sorkar nung adenba Kuki-Zo MLA tem anema lungkak aiter

Guwahati, February 6, 2026 (TYO): Kuki teloktemi Manipur sorkar nung adenba BJP Kuki MLA tem aitsüba manener aser parnoki Hokolbarnü Churachandpur nung sentong tulu ka ayonga agiogo.

Iba mapang Kuki teloktemi MLA tem dang sorkar nung madentsü takhangba agütsüogo.

Tanü Kuki-Zo nunger noklang aika yimdong nung adenshi aser parnok yimyim ayima lungkak aitba den MLA asem mesüka yanglur rongdoka liasü.

Iba sentong ya Kuki Women Organisation for Human Rights aser Indigenous Tribal Leaders'

Forum nung women wing ajanga ayongzüka agi.

Kuki tsür aser BJP MLA Nemcha Kipgen-i Bodbamü New Delhi nungi video conference ajanga deputy CM inyaktsü tezüngzüktep agia liasü. Maneni, Kuki MLA ana- LM Khaute aser Ngursanglur natia Imphal nung tezüngzüktep agiba sentong nung aden.

Iba jagi tanü lungkak aitertemi Kipgen, Khaute aser Ngursanglur nunger mesüka yanglur mi agi rongdoka liasü.

"Tanü sentong nung nisung aika adenba ajanga Kuki MLA temi Manipur sorkar nung adentsü lemtet asoshi mepelaba,

jashiba aser magizükba sayur. Iba lemtet ya public taginüba, külem bangzüngtem aser onoki timtem tulu ajurua aruba senzüka yutsür agiba lir" ta Kuki Zo Council (KZC)-ia metetdaktsü.

Brihostibar nikongdang Churachandpur mokdangtsü merangba noktanga atema Kuki nungertemi security forces dak lung agi ona rara. Iba mapang parnoki lenmang nung tyres rongdok aser additional forces marudaktsüi noktanga liasü.

KZC-i Brihostibarnü New Delhi senden nung adenba Kuki BJP MLA 5 "social boycott" asür ta metetdaktsüogo.

25Mongoya A/C Chuchuyimpang Unit General Kimen mesemet



Sentong nung Hon'ble Advisor Sericulture & Minority Affairs Wb.Imkongmar Lkr-i jembidang tangokba noksa.

Mokokchung, Tsüklai/February 06 (TYO) : Naga People's Front (NPF) 25Mongoya Assembly Constituency kübok aliba Chuchuyimpang Unit nung General Kimen Wb.Merentongzük-er ki mesemetetba sentong agiogo.Sb.Yangertemjen-i wako meshiteta sarasadem külen iba kimen mesemetetba tamaisü 25 Mongoya A/C NPF President Wb.Yimya Jamir-i NPF wako atsüketja liasü.

Tanu iba sentong nung 25Mongoya Assembly Constituency nungi adoksang Hon'ble Advisor Sericulture & Minority Affairs Wb.Imkongmar Lkr-i jembidang Naga nung regional party aika aliba majung,

anungji regional party ka dang alitsüla aser talisa Naga nung ajungtsü ta asüba tangatetba nung India nung regional party tejentiba rongnung tanabuba aser North East nung mezügbuba NPF party nung tener teka amteper inyaka odagi ta akang akanga lemsatet.

Advisor Imkongmar-isa mapang balala nung lenir asütsü asoshi Tsüngremi nübo shimer, Israel nung ainkartemi dang nüburtem anishia aru,saka parnoki parnok anitsü asoshi Tsüngrem dang chuba ka meshi nung Tsüngremi parnok madak chuba asütsü ashi Saul agütsü. Saul mapang talangka chuba asü aser iba sülen David-i melenzük. Tang asen Naga nung anitsü asoshi Tsüngremi Dr.Neiphiu Rio shimteta lir,

Dr.Neiphiu Rio alinü tashi asenoki pa kübok anidakteta pa nem shisa agütsütsü kanga dang nungtaker, anungji Mongoya sanger aser Ao kini pa nungittsüla iba maji asenoki inyaktetra asenok Tsüngremi moatsütsü ta adenshia alirtem ayongzüka jembi.

Sentong nung Chuchuyimpang Baptist Arogo Asso.Pastor(W) Benjongsenla-i sarasadema sentong tenzüka den 25Mongoya A/C Chuchuyimpang Unit President Wb.Imtikumzük Pongen-i tarur pela-a agizüka jembi. Iba den Village Council Chuchuyimpang Chairman Wb.I Zülü Imsong,NPF Mkg.Div.Vice President Wb.Imtitemshi, 25Mongoya A/C Advisor Wb.Yangsümong, NPF Mkg. Div. Advisor Wb.Moasangba Jamir aser NPF Central Elders Chairman Wb.Nungsanginba parnokia telok ayongzüka otep jembi liasü aser NPF Youth Wing Chuchuyimpang Unit tenü nung Sb.Watimoa-i ken tajung ka tena telok ajungmesoba den25Mongoya A/C Chuchuyimpang Unit ketdangpur lenisüba nung iba sentong ketdangsüa agia telok külemi sarasadema iba sentong tembang.

Dimapur aser Chümoukedima nung Pink Taxi 2-wheeler permits agütsütsü

Dimapur, Tsüklai/February 06 (TYO): Regional Transport Authority (RTA), Dimapur & Chümoukedima ajanga temsüa aliba tetsürtem nungi Two-Wheeler Pink Taxi Permits atema applications meshir.

Office of the Secretary, Regional Transport Authority, Dimapur ajanga sangdong ka nung ashiba agi, tetsür empowerment aser self-employment asoshi maongka ama Dimapur atema permit 15

as er Chümoukedima atema permits 15 lemsütsütsü.

Pink Taxi Two-Wheeler scheme ya tetsür kisung atema lir, shirnok Nagaland lisopur arishi küm 20 aser 40 tsüngta asütsüla.

Applicants ya permanent residential certificates, Aadhaar cards den district address, driving license tejangja aser unemployment certificates alir asütsüla.

Application forms ya

Office of the District Transport Officer, Dimapur nung February 9, 2026 nü nungi tenzüka form ka nung sen 100 agütsür meshitsüla. Application form ya February 20, 2026 tashi agizütsü. Application meshidak aliba magizütsü.

Riding/driving test atema shimteta candidates tenü nung ya February 23, 2026 nü District Transport Officer's office, Dimapur nung sangdongtsü.

Pilgrim Hr. Sec. School nung NEET-JEE Foundation Program tenzüker



Dimapur, Tsüklai/February 06 (TYO): Bresthibarnü Pilgrim Higher Secondary, Dimapur nung Class VIII nungi X tashi atema Foundation Program of NEET-JEE tenzüko, koba kaketshirtem academic fundamentals tashi itshitsü aser competitive examinations atema

renemshitsü nükjidong nung lir. Iba sentong nung Youth Icon of Nagaland aser Chief Executive Officer, NITI Nagaland, Rishv Sethi, Software Engineer (JEE-2016 Nagaland Topper) ajanga tayongzüka o jembidang kaketshirtem yimya tajung amshia tajungtiba bushitsü

ajungmesoa liasü.

Sana Singh, Assistant Headmaster, Pilgrim Higher Secondary School ajanga pela agizüka o jembi sentong tenzüker aser Foundation Program indang mangdang kaketshir, tsürabor aser tesayurtem den lemsatetba liasü.

(Manen tapak 8 nung...)

Mokokchung jila nung ghonda ti power shibangtsü

Dimapur, Tsüklai/February 06 (TYO): Power House, Mokokchung nung circuit breaker mechanism aser circuit breaker poles melentsü atema February 8, 2026 (Deobar) nü anepdang 8:00 ako nungi nikongdang 4:00 ako tashi, ghonda ti emergency power shutdown alitsü, ta Achanger T Aier, Sub-Divisional Officer,

Mokokchung Sub-Division ajanga sangdong ka nung ashi.

Iba emergency power shutdown yagi Mokokchung Town aser iba den Asetkong aser Ongpangkong range küboki aita yimtsüng ajunga nung kongshitsü.

Metokmeperi asoshi sasa bilemer, aser nüburtemi aremzütsü mepishir, ta sangdong ajangasa ashi.

Chümoukedmia DPDB senden thinener

Dimapur, Tsüklai/February 06 (TYO): Chümoukedima District Planning & Development Board senden February 2026 nung amentsü aliba thinener, ta Deputy Commissioner & Vice Chairman, District Planning & Development Board (DP&DB),

Chümoukedima, Polan John-i sangdong ka nung metetdaksü.

DPDB züngsem ajungai iba senden thinenba temulung nung ayutsü ayongzüker. Anogo melenshiba indang osang mapangtong nung metetdaksütsü, ta sangdong ajangasa ashi.

Tuli nung health camp ka ayongzüker



Dimapur, Tsüklai/February 06 (TYO): Office of the Chief Medical Officer, Mokokchung ajanga Red Cross Society aser Dr.Imkongliba Memorial District Hospital Mokokchung den teka amteper February 6, 2026 nü Tuli CHC nung Maternal & Child Health and Family Planning Outreach Camp ayongzüka liasü.

Nüburtem nem family planning services agütsütsü

as er mashisa aliba tetsü aser tanurtem temang tendangtsü nükjidong nung iba medical camp ya ayongzüker.

Tubectomy, Vasectomy aser IUCD insertion amala family planning services iba camp nung agütsü. Medical team ajanga CuT inokba pezü aser tube ligation procedures 14 agia liasü. Iba camp nung jila aser temeket yimtsüngtem nungi arua shilem agia liasü.

DAF-i Dr. Ambedkar Scheme indang metetdaksü

Dimapur, Tsüklai/February 06 (TYO): Kohima District kübok temsüa aliba riju ajak nem Dr. Ambedkar Foundation (DAF)-i benoka inyakba Dr. Ambedkar Scheme indang metetdaksüogo. DAF yagi Dr. Ambedkar asoba aser asüba anogo amungtsü atema

grant-in-aid agütsür.

Iba scheme nükjidongji lokti nung tebandang aliba aser mesenmetoi amshibatam aginja social justice ajungkettsü aser awareness aser tanga sentong balala ajanga lokti nung tashi meiti aliba teloktem ajungkettsü asoshi lir.

(Manen tapak 8 nung...)

Chozuba yimtsüng nung Rukuseno tsüksetba aitsür

Dimapur, Tsüklai/February 06 (TYO): Chozuba yimtsüng nung February 1 nikongtsütsü 2:00 ako meta NH-702A, Chakhabama-Mokokchung kinungtsü Rukuseno Shijoh dak gari ka agi tsükoktsür ajenba Chozuba Village Council, Chozubami Razuve Hoho, Chozubami Youth Association, Chozubami Women Society aser Chozubami Students Union nungeri aitsüogo. Iba lendong nung Rukuseno ya asü.

Gari mekümdangi kanga kara anishiba ajanga tasüba atalokogo. Aija alisang ya Jahirul Islam ta jangjaogo. Pa ya Dumper truck driver ka lir. Pa den ano Ajibur Uddin-a aitsür lir.

Ken o bushisüngdangba sülen gari anisang ya yi jemer gari mekümdangi kanga kara aniba ajanga iba lendong ya atalok ta jangjaogo. Iba lendong nung Kohima leni oya aliba dumper truck ana densema liasü.

(Manen tapak 8 nung...)



February 06, 2026 nü New Delhi nung Parliament kima opposition MP temi longkak aitba noksa nung angur.

UP nung SIR kübok final voter list April 10 nü sangdongtsü: EC

New Delhi, February 06 (Agencies): Uttar Pradesh nung SIR exercise agiba sülen final voter list ji March 6 nü masü saka April 10 nü sangdongtsü, ta Hokolbarnü Election Commission (EC)-i sangdong ka ajanga metetdaksü.

EC-i shidi ka ajanga state chief electoral officer (CEO) dang, nenoki February 2 nü mepishiba tu agizükogo aser tanga temepishibatem-a asadangdar, ta metetdaksü.

Special Intensive Revision (SIR) kübok final final voter list ji April 10 nü sangdongtsü.

Lucknow nung osangbenertem den jembidang Uttar Pradesh CEO, Navdeep Rinwa-i, SIR schedule revision kübok EC-i draft roll nung tashishiba benoktsü atema ano ita ka (March 6 tashi)

atsülangtsüogo, ta metetdaksü. Pai ashiba agi, state nung SIR exercise ya yaküm October 27 nü tenzük aser taküm January 6 nü draft electoral roll sangdonga liasü.

Draft roll nung tashishiba benoktsü atema January 6 nungi February 6 tashi mapang agüja liasü, saka national party tem aser state nung aliba party temi mepishiba nung ajemdaker EC-i ano ita ka atsülangtsüogo, ta CEO-i metetdaksü.

October 27 nungi taküm January 6 tashi nung Form-6 application lakh 16.18 agizük aser Form-7 application 49,399 agizüka liasü.

January 6 nungi February 4 tashi nung Form 6 application ano lakh 37.8 agizük aser Form 7 application 82,684 agizük.

Ano bendanglen nungi Form 6A ajanga application 1,073

agizüka liasü. "Tang tashi nung notice crore 2.37 agütsüogo aser tashishiba lakh 30.3 angadanga bentetogo," ta CEO-isa metetdaksü.

Kecha teratatsü mali, kechiyong ano mapang peria agütsüogo, ta pai ashi.

Voters den yariteptsü atema anogo shia anepdang 10:00 ako nungi anündang 12:00 ako tashi booth-level officers (BLOs) alitsü. Parnokisa state nung malirtem, tesem melenshirtem, asürtem, taila voters aser sign asütsü memelungertem jangjatsü aser metokmeperi ajak bentettsü aser sensotem den yariteptsü, ta pai metetdaksü.

Draft roll ji EC website nung aser Uttar Pradesh CEO website nung angutsü, iba dak alia recognised party tem aser booth-level agents nem-a list agüja lir, ta paisa shisem.

Jan Suraaj party temepishiba ken o Supreme Court-i magizük

New Delhi, February 06 (Agencies): Taoba mapang election atema asalentong yanglur mongin, Prashant Kishor-i aniba Jan Suraaj Party-i yaküm Bihar election anema Supreme Court nem ken o agütsü aser election tanaben agishitsü mepishi, ajisüaka Hokolbarnü Supreme Court-i temepishibaji magizük.

CJI Surya Kant aser Justice Joymalya Bagchi nati akümba bench-i, "Ner party-i vote kwi angu? Nüburtemi nenok magizük saka nenok nüngtugu akümtsü atema aenoki judicial

sabang amshir," ta metetdaksü. "Yimtenren party kati mepishiba nung ajemdaker state tesem ajaklen election agishitsü atema onoki tetuyuba agütsütsü makok," ta Chief Justice-i metetdaksü.

Bench-i, onoki iba temepishibaji magizüksü saka nenoki Patna High Court nung kasa ken o benoktsü akok, kechiyong iba ya state ka dak sendakba ken o lir, ta metetdaksü.

Jan Suraaj Party-i SC dang, yaküm Bihar nung election agitsü sangdongba sülen Bihar sorkari Mukhyamantri Mahila

Rojgar scheme kübok tetsür shia nem sen 10,000 agütsütsü sangdonga liasü, aser ibaji ajanga parnoki Model Code of Conduct (MCC) anema inyakogo, ta metetdakja liasü.

Parnokisa Bihar nung election tanaben agishitsü atema mepishia liasü.

Bihar election nungji NDA-i menden 202 aser MGB teloktepi menden 35 ngua liasü. Jan Suraaj party-i state tesem ajaklen 'padyatra' agiba sülen menden 236 nung toktep ajisüaka parnoki menden ka nunga takok mangu.

Malaysia nung India-i Zakir Naik ken benoktsüa akok

New Delhi, Tsüklai/February 06 (Agencies): Tan hopta Ato kilonser, Narendra Modi-i Malaysia semdangtsü aser iba mapang nungji linük anati shishilembaba aser defence tesendaktep yanglushitsü, ajisüaka kasa mapang nung India-i Malaysia dang jenshia senzüsang, Zakir Naik India-i anir aotsü atema mepishitsüa akok.

Modi-i Malaysia semdangba mapang nung linük ana tsüngda tezüngzüktep aika agitsü aser item rongnung semiconductor industry densema lir.

Zakir Naik dak sendakba nung tasüngdangba ka langzüdang MEA secretary (east) P Kumaran-i, "Tesüiba mapangtem nunga jenjang balala nung iba onük süoka jembitsü atema maongka aiben

nguogo. Asenoki maneni iba ken o benoka jembitsü aser asenoki aginüba ama ataloktsü imlar," ta metetdaksü.

India aser Malaysia na tsüngda 'extradition' tezüngzüktep agia lir, ajisüaka Malaysia-i ashiba ama Zakir Naik dak sendakba ken o yabo judicial nung ajemdaker telemetba agitsü.

Kumaran-i, Modi aser Malaysia Ato kilonser Anwar Ibrahim nati India-Malaysia Comprehensive Strategic Partnership kübok lenla balala nung terenlok asadangtsü, talisa shishilembaba, investments, defence, security, semiconductors, digital technologies, renewable energy, shisaliok aser healthcare sectors nung terenlok asadangtsü, ta ashi.



February 06, 2026 nü Mumbai nung Reserve Bank of India (RBI) Governor, Sanjay Malhotra-i osangbenertem den jembidang tangokba noksa nung angur.

Jalandhar nung AAP lenir ka khaset

New Delhi, February 06 (Agencies): Hokolbarnep Punjab kübok Jalandhar nung gurudwara tekülem kima mejangjaba nisung ana scooter ka nung aruba sülen Aam Aadmi Party (AAP) lenir, Satvinder Pal Singh khasetogo, ta police-i metetdaksü.

Iba tatalokba nung ajemdaker party tem tsüngda aitsütep tenzükogo.

Police-i ashiba agi, anepdang 8:00 ako meta nisung ana scooter nung aru aser nisung kati Oberoi dak injang aiben khaloktsüba sülen scooter nungji jena ao.

Oberoi gurdwara nung sarasademba sülen Thar gari nung aotsü lia pa dak injang aiben khaloktsü. Pa hospital-i anir ao saka sür bener aru ta sangdong.

Iba tatalokba sülen police-i iba kiyongji longbangogo aser aibelenertem maitsü jangjatsü atema bushisüngdang tenzükogo.

Sri Ram Super Specialty Hospital nung doctor Vishal-i, "Pa dak indang 8-9 shi khalokja aliba bushitet. Pa emergency-i anir ao saka mekümzükatet," ta metetdaksü.

Oberoi hospital tonga anir aruba mapang nung blood pressure ji record asütsü mekoki liasü aser pa teku nung injang ka densema temang nung injang aika liasü.

Punjab assembly nung Opposition lenir, Partap Singh Bajwa-i, Chief Minister Bhagwant Mann yimsüsüba kübok state nung tzüzüng-özüng tensa raksaogo, ta aitsü.

Paisa, state nung ruling party nungi lenirtema mekümzüktetra tanüngba sensotem atemabo teimla kecha mali, ta metetdaksü.

"Tanübo Punjab nung tetsübu tensa aser ozüng alema inyakertem lir. Ketdangzüba laoadokogo. Ajisüaka AAP sorkarbo PR nung mazünger. Chief Minister Bhagwant Mann-i telangzüba agütsütsüla: Iba tensa atema shibai khuret abentsüla?" ta pai asüngdang.

Shiromani Akali Dal lenir Bikram Singh Majithia-ia, "Tang Punjab nung iba tensa ya yimya ka kümogo. Tesem mashie ka nung pei melungba ama nisung mashie tepsettsü akok. Tensa mejungi raksaogo saka nai (Chief Minister) menanzükür," ta ashi.



February 06, 2026 nü Jammu nung Jammu & Kashmir Lt. Governor Manoj Sinha (tiyong) aser Chief Minister Omar Abdullah nati Union Home Minister, Amit Shah agizükdang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 07, 2026

Anü tajungba adoktsü imlar

Nagaland anüdoklen aliba kintemi tang aliba Nagaland state nungi balaka razüka orr Frontier Nagaland state akümtsü asoshi takangba agüja apuso saka jembia-jembia state balaka masü saka Nagaland-bo Nagaland kübok alitsü saka terenlok mapatem inyaka aotsü asoshi sentong yangluba, ketdangsüba aser senotsü lemzüksüba maparentem nungang Nagaland state den külemi mesüi bendangbendanga amshitsü asoshi Union government den tangatettep ken o ka renemtetbaji, Naga nunger anüdoklen alir kintem asoshi dang masü saka Naga nunger ajak asoshi takok aser temoatsü osang tajung ka lir. Atangji, tenüng agibo Nagaland anüdoklen alirtem asoshi, saka Nagaland anüdoklenja Nagaland, anungji Naga nunger inti meyong lir. Aji oda, Nagaland anüdoklen alirtem asoshi center nungi yokba sentong aser teyaritem tatongtsü agi tonga yariteptettsü asoshi tang nungi Frontier Nagaland Territory Authority (FNTA) kümteta inyaka aotsübaji, anübo akhi ama anüdoklen nungisa adoktsü saka tajungba aser teperangba adoktsü imlar. Atangji, Nagaland state kümer joko küm roker dak tali süir, ajisüaka Nagaland ya küm dang tain aküm ashi, tashitemetet aser tangatetba agi terenlok mapatem inyakba nungbo kenyongi main rajang akümba dang angur. Aji oda, Nagaland nung government school-tema Nagaland state anguba mapang lapokba nungi tajungba aküm masü saka tesayuba nunga aser kiojen nunga tamajungba küma-küma orr, tangbo government school-tem daka temulung malemer, anungji tazünger mali kümogo. Kasaji, government mozü kitem daka temulung malemer, anungji government mozü kidangbo taneptsü mangutsü amai nübortemi bilemer. Kasaji, akhidang Nagaland state nguli gari lenmang lapoka aobatem aika anepalu mesütet menendoka lir aser India nung National Highways rongnunga Nagaland ajangba Highways-sa tilaba aser tamajungba asütsüsa asenokibo yangluteter. Aji oda, anüdoklen dang masü saka Nagaland anülulena Nagaland ajak asoshi sen crore meyirijang aika endoka yangluba Smart City ka dang lir, aji Kohima. Ajisüaka, asenok Smart City nung tzü agi anünger, light tesangwa agi meperir, lenmang majungba agi Smart city nung smart-sa mesenzüteter. Kasaji, Nagaland ajunga senteper anüolen shishilembaba yimti ka lir, aji Dimapur. Ajisüaka, iba yimti yimdonga memerükteter aser meshimetsür agi tasüng, kar auso amer yimdong nung meshimetsür, kar prangpong amer meshimetsür aser karbo pen amer meshimetsür, anungji shishilembartema tali majung, Karbi Anglongleni lumadagi. Ibaji asen akaba Nagaland tia lir. Aji oda, kodang Nagaland tiaji bilemdangdir, anüdoklen o anülulen alirtem na rongnung koba-iang Nagaland temeimba aser tesempaba-ar ashitsü makok ka, toktepa raksadagi. Iba ama Nagaland inüseta mainba tensa tia ka nung, Nagaland anüdoklen alirtem lungjemer peisasa pei lima tajungba küma yanglutsü asoshi FNTA tenzükbaji, Nagaland anüdoklen alirtem asoshibo Nagaland state-a tangang tenzüker ama bilema kenyongi sentong aser mapa ajak tasen küma tenzüksü asoshi mapang tajung ka bentsür arur asütsü. Aji oda, asenoki tangatetba tajung nung inyak tenzükra, Nagaland anüdoklen alirtem o anülulen alirtem na toktepa terenlok mapatem ochi tashiba aser tajungba inyaksü asoshi anü tajungba ka adoker asütsü. Tangbo, Nagaland nung anüdoklen alirtemang Nagaland anülulen adenshia liteper, saka FNTA ajanga Nagaland anüdoklen nübortem nungdakba ajak angutsüsa terenlok mapatem takok ngua inyaktetra, kopi melii Nagaland anülulen alirtemang anüdoklen bushia oagi ali tenzüksü. Aji oda, FNTA ajanga Nagaland anüdoklen nungi Nagaland nung alirtem agir anünga hydro aser solar power adokdaksütetra, gari lenmangtema shitakba International aser National Highways küma yanglutetra, Nagaland anüdoklen aliba mozü kitemang tajungba süra aser Nagaland anüdoklen aliba school, college aser university nungang shitakba shisaliok ngutetra aser Nagaland anüdoklen alirtemang ochitashiba, teinyaknüba, awashi temetetba aser tangatetba süra, asüng Nagaland anüdoklen-jiang shitakba Naga nunger ajak nümadanga adenshia litetba Nagaland asütsü. Aji oda, tangaria hau ta asütsüsa FNTA ajanga Nagaland anüdoklen kasa anüsa süaka, anü tajungba aser teperangba küma adokdakja sayutsü imlar.

OLEMSABANG

Manokshiba Lung

Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

La mulungjang nung arubaji ya dang liasü-" Kinungbo küna balaluya asünungbo tanur asem tia ayatai asütsü aser kechi komaka asüyong küla ni asoshi tanur asemji ajak dang taoba, anungji ni ozü kibong kümzüksü." Ashilai la taküm Medembai ashiocksüa raksatsüba dak meranglok saka tanur asem tia dak rangloker kechi komaka asüyonga lar kibong kümzüksü aser Tsüngremi la yaritsü ta tamang tulu liasü. Anogo ishika süir kinungbo ainlen nungi shilang aser kibong den tanaben lungjem. Ashilai chirnurtem ajak mejanger külen kinungbo dang tatalokbatem ajak ashi. Medembai kodang aji angashi, pa kanga aoksa aser idangyongjisa apudaker pai kanga tai inyakogo ta tatok meshi. Ashilai komasür tebu tajung kati yamai inyak ta asüngdangdang, Medembai langzüa ashi, pa teti mapai aodang Ajunglar dokan nungji tilaterisa alir aser idangji tena metetepa aküm. Tena tesendaktep tera tali küma aodang tenati meinyaksü mapa inyakadok ta ashi. Saka Medembai tena joko piladokogo aser kecha mali ta ashidang Ashilai süra kinü tanur mesoi alibaji koma asütsü ta asüngdang nung Medembai tanurji mesoi raksa endoktsü ta ashi. Ashilai iba o angashia kanga jashi aser kinungbo dang yamaji kodanga meinyaksü kechiyong iba atakatem Tsüngrem nungi arubajibo parnoki metizüksü aser kechi komaka süaka kinü tanuribo kecha tai meinyak. Anungji tanurji asotsü aser par kibongi reprangtsü ta lai kinungbo ta ashi. Medembai kinungtsüi iba tashi yimli tajung sayur nu ta pela saka temulung raksaa pa mulung nung ajep. Iba aonung Medembai kinungtsüi ashiba ama inyaksü nangzük aser Ajungla dangia phone süa o ajak hai haura kaa jembir mejang.

Alima nung molumi ajangshi Anogo ka nungi ka ta süia aodang, Taochir kibong nung temeim aser teputep tera rosepa aküm. Medembai tanur asem aser kinungtsü nem mapang magütsü aser lia liabo mapa nungia menur arua kibong tekülem nung aibensa maten. Ashilai kinungbo dang ya kechi küma aor ta asüngdangdang kecha melangzüi ajem ajema ali. Mapang tatsüka dang lirbo Medemba kidangi marui aküm aser itasen ishika dang bener arutsü tenzük. Ashila kanga taremsük tetsü ka süaka itasen junga bener maruba agi kidang metokmeperi agi asüng aser khen khenbo la kanga jashia liasü aser kinungbo dang kechi nungsa sen yamai endoker ta asüngdangdang pa mapa tongtibang kar nung endok ta ashiba dak alaka kecha mashi. Anogo nungi ita ta renteta aodangbo temesepba chiyungtsü dak Medembai tenük yok aser kodang mapa nungi kidangi shilangdir, kinungtsü aser chirnur ngua pa jashi aser lia liabo tilateri ajak nung yakta dang ain adoka pai par kibong dak teka sangshitsü tenzük. Ashilai kodang kinungbo dang sayubentsü tajung shia pa azüoktsü shidir mesüra tanurtemi parnok school nung nungdakba osettem alitsü indang shira, parnok ajak taktang telungbai anir aitsü aser shiruru daka nisungi mebenshiba aser meinyakbatem pai kinungtsü aser tanur asem dak inyaka temeimtsüka azük. Medembai azükdang parnoki ola adoka jepira ano tali dang azüksü ta merenshi. Kiyongertemi Taochir kibong ya yamai akümer nu ta aoksatep. Medemba jakla shisatsü yamai akümtsü yabo pungmang nunga mepungmangsem tasa kiyongertemi jembai. Alima nung molumi ta asübaji Taochir kibongi ajangshia liasü. Medemba taküm melenshibaji tanga kecha agia masü saka alima shi azü nem pa taküm kokdaksüba agi liasü. Tesüiba aonung ka pai kinungtsü dang nangzükba to amadoker Ajungla dangi sa tanaben meyip aser itasen ajak la dak indok aser par kibongbo ayatai tia nung toktsü. Par kibong lia aruba aser Tsüngremer taochi indang mebilemdangi pai pa taküm alima tejangraba nem bendanga agütsü koba ajanga khenü anogo teyanglur Tsüngremi pa tenarong tashi agi mesüksü ta asübaji amadoker temenen nung dang nemzü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung alibajilakanung Tenlaki 22 nungi 21 bo raksatsüogo



Myanmar kübok Thantlang Town nung sepaitemi raksatsüba Tenla ki ka noksa nung angur.

February 06, 2026: January 30, 2026 nü Burma Research Institute (BRI)-i report ka ajanga 2021 küm nungi tenzüka Myanmar nung sepaitemi Khristantem amakba, tepsetba, amokmerenba aser Tenla kitem raksatsüba osang tejangja metetdaksü.

Talisa Myanmar kübok Chin, Kachin, Karen aser Karen state tem aser Sagaing Region nung Khristantem kanga reshikangshiba osang parnoki metetdaksü.

BRI Board Chairman, Rev. Dr Robin Stoops-i, tang tesüsabuba Burma Research

Institute indang report nung Khristantemi timtem balala ajangshiba aser sepaitemi Khristantem reshikangshiba osang tejangja metetdakja lir, ta ashi.

Khristan nütsüng teimba aliba jila- Thantlang Town nungbo Tenla ki 22 nungi Tenla ki 21 bo raksatsüogo aser iba jila nung Khristantem aika jenshiogo. Myanmar nung Tenla ki aser Khristan kiojen 340 dak tali raksatsüogo.

2022 küm nungi 2025 küm tashi nung Myanmar nung Khristan 149 tepsetogo aser 218 pua jail nung puokogo, ta

Open Doors-ia metetdaksü.

Myanmar nung Khristantem aika arem balala nung jenshia lir aser anogo shia parnok taküm amokmeren nung dang lidar, ta Khristan kati metetdaksü.

Nüburtem aijka jenshiogo, ajisüaka pastor tem aser Khristan lenirtemibo maneni nüburtem tenzüka alitsü atema jena maoer.

ICC staff kati, "Burma nung reshikangshi anentsü atema nenok sarasadem nüngdaker. Yimlibilema Myanmar nung reshikangshi ajangshiba Khristantem atema maneni sarasademjang," ta metetdaksü.

MP nung Arogo kimong rakzüktsü merangba court-i nokdang

February 06, 2026: Madhya Pradesh nung provincial sorkari Protestant Arogo indang Khristan reju ka kimong rakzüktsü merang, ajisüaka court-i nokdangogo.

Indore nung sorkar ketdangsertemi ali acre 4.2 rakzüktsü merang, ajisüaka Madhya Pradesh High Court indang Indore bench-i ibaji nokdangogo. Arogo liji sen billion 4 shi jenjang lir. Iba li nungji küm 139 tejaklen lapokba Indore Christian College lir.

Sorkari tashiyim amshia iba liji rakzük asübo Arogoi ketdangsüba college nung azünger kaketshir 2,300-i timtem ajangshir lila.

January 27 nü court-i obendang agütsüba February 3 nü yimjak nung sangdongogo.

Justice Pranay Verma-i, district administration-i tang aliba telatetbatem anema inyakogo, ta shia iba liji magitsü tuyu.

Indore District Collector Shivam Verma-i Arogo liji agitsü atema inyaksangshitsü tuyua liasü, ajisüaka Arogoi ashishiba sülen court tiyongtsüi aita nokdangogo.

January 23 nü district collector-i pa kübok inyakertem dang Khristan college aliji anogo asem tsüngda sorkar meyong

akümtsü atema inyaksangshitsü tuyua liasü.

January 23, 2026 nü District Collector Verma-i, iba li ya mission atema agütsü, saka tangbo mission ji mali, ta shia iba li tanaben agitsü tuyua liasü. Tangbo iba tesem nungji tetsürtem hospital mali aser college-a tanga teloki ketdangsür aser fees agir, anungji tangbo iba kimong ya ozüing alema business inyakba tesem ka kümogo, ta pai metetdakja liasü.

Iba college jagi tim masüba nung aliji commercial atema amshir, ta collector-i aija liasü.

Iba li ya 1887 küm taoba mapang Holkar dynasty-i hospital ka aser school ka asütsü atema Canadian Mission ka nem agüja liasü; iba ya taoba mapang yimsüsürtemi sempet ama Khristan missionary tem nem agütsüba lir, anungji state-i aliji meyipa agitsü makok, ta court-i metetdakja liasü.

Holkar dynasty-i hospital aser school asütsü atema Canadian Mission ka nem agütsü aser kasa küm nungjisa missionary temi tetsürtem atema college ka asü aser kümtem süia aodangbo iba college ya kanga nüngtugu shisaliok reju ka aküm.

February 3 nü

osangbenertem den jembidang Khristan college nungji principal Amit David-i, "Court-i iba obendang agütsüba atema onok pelar. Taruba hopta trok tsüngda ano maneni ken o angadangtsü," ta metetdaksü.

Paisa, "Iba liji meyipa agitsü asü nunga sorkar dangi maotsü, kechiyong iba ya sorkari lease asüba kiojen ka masü. Iba li ya meyipa aotsü asü nunga Holkar dynasty nungi senmangertem dangi dang aotsü," ta metetdaksü.

Tamalen Arogo ketdangser kati, college management-i college fund atema sorkar dang iba li shilem ka nung commercial dokan lapoktsü asüngdanga liasü, ajisüaka Arogo aitsütsü atema iba atemepishibaji amshir, ta metetdaksü.

Tang Madhya Pradesh nung BJP sorkar lir. Mapang shia Hindu nationalist teloktemi tiyazü nung Khristan rejutem nem tai tongloktsür, ta Arogo lenirtemi metetdaksü.

Tang state 12 nü anti-conversion ozüing benoka lir aser item state tem rongnung Madhya Pradesh-a densema lir.

Nütsüng million 72 aliba Madhya Pradesh nung nütsüng shilem 0.27 dang Khristantem lir. Iba state nung nütsüng shilem 80 bo Hindu nungertem lir.

ANOGO ABEN TSÜNGREM DEN

Tamakok aluba

"Aser Israel chirtemi Kibuba nükdang kechi majung aji inyak, aser Kibuba parnok Tsüngrem amadok, aser Baal aser Asherot tenzük" (Obn. 3:7).

Israel nungeri Tsüngrem tenangzükba senmang amanger külen, Tsüngremi parnok dang ashibaji, nenoki tangar nisüng chirtem den tesendaktep mayutsüla, kechiaser, iba jagi nenok Tsüngrem dak ayuba tamangji anokshitsü (Anitet 34: 15,16 ; Taz. 7:2-4). Saka Israel nungeri iba ozung ya manga. Parnoki Kanan nunger den kiyimba nung sendaktepa liasü. Tangar kin den kiyimba ajanga atalokbaji, bendangertem tsüngrem bener arua Tsungrem chirtem temenen leman nung jajatsü tenzük. Iba tejangji, Tsüngrem temerenshi liasü. Parnok bendanger kubok alitsüsa aküm.

2 Kor. 6: 14 nung ashir, "Mamangertem den mesütepi süngra külemi tapu ma ..." Iba ya Tsüngrem ozung Tasen Lai nung amangbapurtem nem agutsüba ka lir. Asenoki iba ozung nung jajar mejajar ? Tsüngrem temoatsüji bushir asü mebushir ? Mesüra tangar tsüngrem sülenang anidaker asü?

South Korea nunger Pastor Hyun-Bo Son jail nungi chiokogo



February 06, 2026: Yaküm lemsatepba ajanga pa apu.

September ita nung Sotuh Paisa Jeong indang election campaign office nung election nung takok angutsü atema pa asoshi sarasademja liasü aser pai, "Asenoki right-wing candidate nem vote agütsütsüla aser Tsüngrem yimli yangertsüla," ta jembia liasü.

Pastor Son-i "Save Korea" group nung lenir ka ama inyaka tang aliba left lenirtem- South Korea Tir, Ato kilonser aser Democratic Party anemer, ta pa nem tai tongloktsü.

Yaküm September 8 nü Pastor Son aser par kibongibo, parnoki Khristan tesayuba aser Laishiba Seung-yoon interview agi aser nokdakba agi pa apu, ta ashir.

Pastor Son ya Busan Segyeoro Church nungi lir. Pai election nung shilem agi aser Tenla kidang tekülem sentong nung candidate ka interview agiba ajanga pai election inyakyim nung jangjongogo, ta pa nem tai tonglokja liasü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tzülok

(n) tzü telong kümer ayimba (water spout)

* Tzünglu tulu arudang motzü agi tzülok küma ayimer.

Tzülu

(n) tzü mesüoka ayimba lu (field of wet cultivation)

* Lenden lima nung tzülu junga ayimer.

OLONG PAITEP # 7407

	1		2			3				
4		5			6				7	
		8								
9							10			
				11						
12	13					14	15			
				16						
17						18				
19						20				

TIPIEN

1. Kisüng - (4)
3. Idaki - (5)
4. A _ _ _ i - (4)
6. Kecha mait - (6)
8. Pi/tangar - (5)
9. Chima - (4)
10. Kum aika - (4)
11. Ner masü - (3)
12. Putep/tazü - (4)
14. Temechi agi ya akümer - (4)
16. Hopta tsungda telemsa - (5)
17. Na mesüra ni - (6)
18. Nünü-er jabaso - (4)
19. Ozü ki - (5)
20. Saklok - (4)

LANGTSÜNGLEN

2. Oya-a ata - (5)
3. Mato/meshidak - (4)
5. Ta _ _ _ ok - (3)
6. Ozüng latet - (7)
7. Nü sasai - (3)
13. Nija - (3)
14. Tsulo - (5)
15. Chi den achir - (3)
16. Shirang ajung - (4)

OLONG PAITEP # 7406 TELANGZÜBA

TIPIEN :

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER MA



Michigan nung arishi küm 90 tain English tesayur nem Guinness World Record ka agütsüogo. Iba nisung ya Beverly Hannett-Price lir aser lai küm 67 tashi tesayur inyaka aruba atema February 2, 2026 nü Guinness World Records certificate agütsüogo. Hannett-Price-i Beverly Hills nung Detroit Country Day School nung English sayur aser "longest career as a language teacher (female)" atema kulikaket agütsü.

Hannett-Price-i 1958 nungi tesayur inyaksü tenzük aser lai sayuteter tem rongnung actor Robin Williams aser Microsoft CEO Steve Ballmer nung dena lir.

Meghalaya police-i nakmati atudak lendong atema FIR benok



Shillong, February 6, 2026

(Agencies): February 5, 2026 nü ozüngi memelaba nakmati atudak tapoktsü lendong ka nung nisung 18 asüba sülen East Jaintia Hills ketdangsürtemi ken o ka benokogo.

Iba ken o ya Bharatiya Nyaya Sanhita, Mines and Minerals Development and Regulation Act, aser Explosives Substances Act kübok Khliehriat Police Station nung benokoo.

Thangsko area kübok Mynsyngat nung tapoktsü lendong atalokba sülen police-i bushisüngdang tenzükogo.

Lendong atalokdak rescue teams-i mang 18 ngutetogo aser nisung ka yiruba Sutnga Community Health Centre-i mezüng anir oa anepalur tangaleni anir ogo.

Iba tesem nung National Disaster Response Force, State Disaster Response Force aser Special Rescue Team ajanga

maparen maneni inyakdar.

"Iba ozüng alema inyakba maparen nung shilem agirtem osang public dang meshir" ta Superintendent of Police Vikash Kumar-i ashi.

Osang agütsürtem tenüng miimbanga ayutsü aser sempet agütsütsü ta ketdangsürtemi metetdaksüogo.

Meghalaya nung nakmati aika aliba district tem nung ozüng alema maparen inyakba iba lendong ajanga sayur.

Patharkandi nung kibong 1,000 tema nem eviction notices agütsü

Guwahati, February 6, 2026 (Agencies): Assam Forest Department-i Sribhumi district kübok Patharkandi anasa reserved forest areas nung alir kibong 1,000 tema nem eviction notices agütsüogo.

Patharkandi constituency kübok Isharpar, Madhabpur, Balia, Madhurbond, Chagalmoya, Magura aser

Jogisora yimtsüngtem nung alir nem notices agütsü aser parnok dang mapang tatakzük ka nung forest land toktsür aotsü tuyuogo.

Iba notice anguba sülen kibong aikati pei pei ki bensa tenzükogo. Iba tesem nung alir aikati parnok küm aika ashishitep kecha melii dang lia arur ta ashir.

"Kübobba yangi asü. Küm

aika Forest Department-i kecha meshii dang aru. Tang onoki yangluba ki tashiyim agi raksadaksür aser iba tesem toktsür aotsü tuyur" ta tantsür kati ashi.

Iba eviction drive ajanga yimdaklirtem tebilemtsü abener kechiyong parnok meyong tanga ali kecha mali mesüra rehabilitation arrangement kecha maka.

Brahmaputra nung luxury cruise & industrial cargo külemi senzür



Guwahati, February 6, 2026

(Agencies): February 6, 2026 nü Indo-Bangladesh Protocol (IBP) route ajanga Brahmaputra nung luxury cruise vessel aser Over-Dimensional Cargo (ODC) vessel ka külemi apusoa süitepogo.

Iba ajanga Brahmaputra ayongi Northeast nung tourism aser industrial logistics pusema nungitba sayur.

Tawa tasen tenzükba cruise vessel MV Alfresco aser ODC vessel nati Dhubri kübok

Fakirganj tonga aru.

Kasa inland waterway corridor ka nung high-end tourism aser heavy industrial cargo külemi senzüba ya tetibo majurur ta ketdangsürtemi ashi.

MV Alfresco ya Brahmaputra Cruise Pvt. Ltd. ajanga anepalur aser Guwahati-i mezüngbuba atema arur. Iba ajanga Assam nung river-cruise sector ulushir.

Külen, ODC vessel nung Numaligarh Refinery expansion project atema osset tarettem

bena lir aser Tezpur leni aoer.

Rong anaprongi Dhubri stretch takok ngua süiogo aser anogo asem nungi pungu tsüngda pei pei tesem tonga aotsü ta Inland Waterways Authority of India (IWAI) ketdangsürtemi ashi.

IBP route ajanga road networks temesü ajanga rongtem senzür aser iba ajanga carbon emissions ajema akümer aser ali ajanga industrial equipment tulu mebenetba belenteter ta ketdangsürtemi ashi.

Pakistan nung mosque ka anasa nisung 31 pokset, 169 yiru

Islamabad, Tsüklai/February 06 (Agencies): Pakistan yimtiba Islamabad nung tamangba yimsü indang centre ka nung takum bendanga agütsür bomb pokdaksü südi ta temulung melemteti aliba lendong ka nung nisung 31 asü aser 169 yiru.

Lendong atalokba tesem nungi osang ka ajanga ashiba agi, federal capital nung Shehzad Town area nung Shiite mosque, Tarlai Imambargah nung iba lendong ya atalok. Uzbekistan Tir Shavkat Mirziyoyev-i anogo ana atema Pakistan semdangba mapang iba lendong ya ataloker.

Police aser rescue workers tem iba lendong atalokba tesemi oa teyari mapa inyak tenzük. Iba lendong nung nisung 160 dak tema yiru ta Pakistani media ajanga ashir.

Iba lendong atalokba sülen mozüki ketdangsür temi

emergency sangdongogo. Yirur alirtem ya anepalutsü atema Pakistan Institute of Medical Sciences (PIMS) aser Polyclinic Hospital nung anir oa lir.

Online nung video balala prokshiba nung iba lendong nung nüburtem tetsübo nung jenshiba nguogo. Yangji aliba ketdangsür temi tensa azüoktsü meranga yirur alirtem yaria liasü. Islamabad Capital Territory Police Spokesperson Taqi Jawad-i ashiba agi, iba lendong atalokba jangjatsü kerara aser iba ya takum bendanga agütsür inyakba asü bomb miima yur pokdaksübar jangjatsü atema forensics team nüngdaksü.

Pakistan indang Interior Minister Mohsin Naqvi-i iba lendong aitsü aser ketdangsürtem dang yirur alirtem tajungtiba nung anepalutsü ashi.

Parliamentary Affairs Minister Tariq Fazal Chaudhry-

ia khukhua aitsü aser "Iba ama kiralongra mapa agi linük temulung tilaba makumtsü. Asenok ajak yimjung, tatok agütsüba aser tashi ita alitsü nüngdaker, aser ozüng amshirtem den onok dena lir," ta ashi.

Iba lendong atalokba atema telok katia tenüng agia mali, saka Tehreek-e-Taliban Pakistan (TTP) mesüra Islamic State teloktem dak temulung malemer, shirnoki taoba mapang Shiite yimsü amanger dak amakba asoshi tenüng sena liasü. Baloch separatists den security forces temi rara telungpur 216 shi tepseter hopta ka jungnüa lia iba lendong ya ataloker.

Islamabad nung November 2025 nung district and sessions court building ka kima takum bendanga agütsür bomb pokdaksüba nung nisung 12 tepseta 30 yirutsür ita asem jungnüa nung Hokulbarnü iba lendong ya ajurur.

Russian mitkar tanishir ka dak ishiben akha

Moscow, Tsüklai/February 06 (Agencies): Russia mitkar nung tanishir ka dak Moscow nung ishiben akha aser yirua lir.

Lt Gen Vladimir Alexeyev ya yimti north-west tsütsü nisung aliba apartment block ka nung iba lendong ajuruba sülen itangjisa mozü kidangi anir ao aser pa temang koma aliar mejangja.

Russia indang GRU military intelligence directorate nung Alexeyev ya jenjang tanabuba tanishir lir aser küm pezü jungnüa jakdang Ukraine amak tenzükba sülen mitkar tanishir dak tenük yokba ibai tesüsaba alitsü.

Salisbury, UK nung 2018 küm nerve agent amshiba ya GRU mapa lir ta tai tongloktüba sülen European Union aser UK ajanga pa nem sanctions agüja lir.

"Lendong ajurusang yimti nung aliba mozüki ka nung lir," ta Russia indang Investigations Committee nungi Svetlana Petrenko-i ashi aser nisung tepsettsü merangba ken o ka lapokogo ta metetdaksü.

Prangbong bena alir ya jena ao aser bushisüngdang temi CCTV footage bushia tenük kuli alirtem den jembitar.

Prangbong ishiben akhaba ola angashia ni sak aser kidanger kati teyari bushia ayimten, ta Alexeyev'er kidanger kati osangbener dang ashi.

Ukraine nung raraba

mapang Alexeyev-i shilem tulua agia arua 2022 küm Russia-i Mariupol sapanger amakba mapang Ukraine den jembishinüba nunga shilem agia liasü.

Wagner mercenary group tekolakba Yevgeny Prigozhin den jembishinütsü atema pa yoka lir, shirnoki June 2023 nung sorkar anema mapang tatsüka nokdaka liasü.

GRU nung pa dak temaba ya Igor Kostyukov lir, aser pa ya Abu Dhabi nung US aser Ukraine den security ken o jembiba nung Russia telok nungi tekolakba ama shilem agitar.

Iba lendong atalokba indang Russia Tir Vladimir Putin nem metetdaksüogo, ta Kremlin odongtar Dmitry Peskov-i ashi. "Mitkar tanishir takum kumzüka taneptsü angutsü imlar," ta pai osangbener dang ashi.

Moscow nung Volokolamsk Highway nung aliba residential block nung Hokulbarnep iba

lendong ya shiri agütsüar ano mejangja saka Russian Foreign Minister Sergei Lavrov-ibo Ukraine dak tai tongloktsür.

Kyiv-i telangzüba agüja mali saka taoba mapang Russia mitkar lenirtem dak amakba kar tenüng agia lir.

2024 küm Moscow nung nisungtem aliba ki tuluka kima bomb pokdaksüba nung mitkar tanishir Igor Kirillov tepsetba asoshi Uzbek nunger ka January ita tepuokdaki yoka lir. Ukraine indang SBU intelligence-i iba lendong agütsüba tenüng agiogo.

Lt Gen Kirillov ya Russia indang Nuclear, Biological and Chemical Protection troops tanishir liasü.

December 2025 nunga Moscow nung gari ka telung nung tapoktsü oset ka apokba nung GRU nung tanishir Lt Gen Fanil Sarvarov asü. Pa ya armed forces indang operational training department tekolakba liasü, ta ashir.

Mokokchung Town Ao Baptist Churches Mission

MULUNG NEN O

Aenjeti (January) 30th-31st, 2026 anogotem nung Mokokchung Town Ao Baptist Churches Mission (MTABCM) ajanga ayongzükbä "Ao Kin Tsüngrem Dang Temenen Nangzükbä Sarasadem Sentong" Mokokchung Town Baptist Arogo Tenla Ki aser Imkongmeren Sports complex nung takok aser temoatsü tulu ngua agitet nung tamasa asen Teyanglur Tsüngrem nem Khonang tetushi ajak agütsür.

Iba sentong tobur junga aser tiptema agitettsü asoshi MTABCM kübok Arogo Ter (10) nungi Deacon Board, Toklang Tenzüker, Lanurtem, kija, Kibong, Yimden aser Lokti shirnokisa pei mapang, rongsen, nübu, sempet aser shisatsü tajung agi asen Ao Kin ajungtsü asoshi tenlaogo, nenok ajak dang MTABCM-i kümrem pelaba lemsateper. Ano kija kibong, telok kwikati chain of prayer nung shilem agiogo, Tsüngremi nenok ajak maneni Pa yimli yangertsü asoshi ajungketa moajangma ta sarasademtsür.

MTABCM-i item kija, kibong aser teloktem dang pelaba lemsateper;

- Mr. & Mrs. Bendangakum Mkg. for Sound system & LED Screen
- Dr. Limanaro, MTBA
- Mrs. Sentila, Yimyu
- Ms. Temjenkala, Tzüsapang
- Mr. & Mrs. Tsükti Longkumer
- Mr. & Mrs. Lanuwati Pastor Mkg. Comp. Baptist Arogo
- Mr. & Mrs. Imnameren Mkg. Chungtia
- Mr. & Mrs. Chubamaong Chuchuyimpang
- Mr. & Mrs. Odimendang Süngkomen Ward
- Mr. & Mrs. Imchalemba Mkg. Compound
- Mr. & Mrs. Temsumongba Tzüsapang
- Mr. Temshi Imchen Artang Ward
- ABAM, Impur.
- NCRC, Mokokchung
- Pentecostal Church, Mokokchung
- Catholic Church
- IEF, Mokokchung
- Deputy Commissioner Mokokchung
- District Administration
- S.P Mokokchung
- Traffic Police Mokokchung
- Ao Senden
- All Ward Union, Mokokchung
- Watsü Mungdang
- AKM
- MCCI
- MMC
- Press Club Mokokchung and all Print & Digital media platform
- Tzüsapang Yimden
- Alempang Ward Yimden
- Mokokchung Compound Yimden
- Longmisa Village Council
- Teyong Mepu Longmisa Village
- Süngtsüng Mepu Longmisa Village
- Kilenyapang & Imsütoshi Mokokchung Village
- Raising Star Club Mokokchung Village
- Longjang Baptist Arogo
- Mopungchuket Baptist Arogo
- Longsa Baptist Arogo
- Aliba Baptist Arogo
- Mokokchung Baptist Arogo
- Nükmen Baptist Arogo
- Longkhum Baptist Arogo
- Ao Baptist Arogo Diphupar
- Aoyim Baptist Arogo
- Medziphema Town Ao Baptist Arogo
- Longchar Tent house Mokokchung
- Mongsenyimti Senso Telungjem Mokokchung
- Mangyangnokcha Higher Secondary School
- Süngratsü Students' Union
- Imchenlar Naro Kapayong
- Forest Colony Youth, Süngkomen Ward
- Waromung Fellowship Mokokchung
- Waromung Senso Telungjem Mokokchung
- Longsa Senso Telungjem Mokokchung
- Longsa benjong Menden Artang Ward
- Chungtia Fellowship Mokokchung
- Ungma Zünga Artang Ward

Sd/-
Rev. Puryapang
Chairman, MTABCM

Sd/-
Mr. Sentiyanger
Secretary, MTABCM

MOLUNG NEN O



ASO :
06/04/1959

ASÜ :
02/02/2026

Onoki kodanga amatsü makokba asür **Wb S. Aliba Jamir** (Akhoya) ajungbena akümüli tembangba anangi ozü asüko mapang piyong lokti tentet balala, kija, kibong aser kiyong-kinar shirnokisa nübo, rongsen, shisatsü aser sarasadem nung yaritepogo, nenok ajak dang kangasa pelaba lemsateper.

Nenok temeim mapa tulu asoshi Tsüngremi talubosa moajangma ta ozü sarasadem.

~ Temein, Kinungtsü, Jila, Aser, Kinungertem.

ALI TAYOKTSÜ LIR

Nikhekhu Village
100/100 sq. ft Rs 5 lakh
**Contact No. :
8415081855**

AMAM-i ayongba 9 buba Auto X & Moto X sentong tenzükogo



LL Group Managing Director Longden Longkumer-i Moto X lapoktsuba mapang.



Mon DTO Imkumwapang-i AutoX lapoktsuba mapang.

Mokokchung, 6th Feb (TYO): Adventure and Motorsports Association Mokokchung (AMAM)-i ayonga 9 buba Auto X & Moto X 2026 sentong Imkongmeren Sports Complex, Mokokchung nung tenzükogo. Iba sentong nung north-east state balala nungi arua shilem agidaki.

Feb 6 nep Auto X sentong Mon District Transport Officer (DTO), Imkumwapang-i lapoktsü aser anüngdang Moto X sentong LL Group Nagaland, Managing Director, Longden Longkumer-i tenzüksü.

Auto X nung tetoktepba telemsa asem lir - mezüngbubaji Open Category aser yangji

parnok 25-i shilem agidar, tanabubaji - Below 1300cc nung nisung 24 aser tasembuba SUV category nung parnok 10-i shilem agidaki.

Moto X tetoktepba nung telemsa ana - ka Beginner aser iba nungji nisung 10-i shilem agidar aser tanabuba tetoktepba open category nung parnok 8-i shilem agidaki.

Iba den külemi north-east championship ta sür tetoktepba ka agir aser ibaji tang AMAM-i ayongba sentong nungi tenzuka küm piyong north-east state balala nung motorsports sentong balala nung shilem agia aotsü aser item tetoktepba nung shibai points tajungtiba

ngudir, paji best driver shimtsü aser iba sang jagi north-east meyonga Indian National Rally Championship (INRC) nung shilem agitsü maongka angutsü. Taküm iba tetoktepba nung parnok 33-i shilem agidar.

Item tetoktepba telemsa balala nung takokertem nem trophy den certificate aser sen agi senpetsütsü. Iba sentong ya Feb 7 nü tembangtsü aser senpet agütsüba sentong aonung 6:00 ako nungi tenzüksü. Iba sentong nung MLA & Advisor, Social Welfare, Government of Nagaland, Wangpang Konyak tongti tesemdanger asütsü jaoka lir.

Chümoukedima nung U-13 ASMITA Zone Football League 2025-26 ayongzük

Dimapur, Tsüklai/February 06 (TYO): Chümoukedima Football Stadium nung February 5, 2026 nü Under-13 ASMITA Zonal Football League 2025-26 (East Zone) ayongzuka ASMITA aser Khelo India sentong kübok East Zone ajunga nungi football asayatsü sempet aliba lanurtem lungjemdakja liasü.

Deputy Commissioner, Chümoukedima, Polan John-i iba sentong moaja aden aser asayartem den jembidang, telungjem yimya tajung yangertsü atema football ya tashi tulu aliba hadir ka lir aser iba ya ajanga putu balala nungi nüburtem külemi lungjemdaksür, ta ashi.

Nagaland sorkari saisapong indang ki o jen tashi itdaksüba atema pai pelaba lemsatop aser Youth Resources & Sports Department aser ASMITA ajanga grassroots football, talisa tetsür chanutem asoshi iba asaya jenjang ajungkettsüba atema tenüngsang agütsü.

Saisapong nung maongka kasa agütsütsü tongtipang lir aser ASMITA yagi saisapongtsü jangrar nem tokteptsü lenmang lapoktsür, ta

pai ashi.

John-i tsürabortem dang pei tanur saisapong nung yaritsü ajungshia liasü.

U-13 ASMITA Football League 2025-26 nung state balala nungi shilem agiba ajanga iba ya sempet jangjaba nung tongtipang mera ka akumer, ta ashi.

Asayartem dang temulung ajak agi yimya tajung nung asayatsü ayongzük aser asaya shia angazüksü maongka angur ta DC Chümoukedima ajanga ashi.

Tang financial year kisüing nunga ASMITA sapang kübok asaya 32 nung asayamung 1,250 dak tema ayongzuka arur aser linük tesem balala nungi saisapong tetsür 1.5 lakh dak tema ajangzük, ta Abhinav Sharma, Deputy Director, Khelo India Events, Sports Authority of India (SAI), Ministry of Youth Affairs & Sports ajanga iba sentong nung metetdaksü.

ASMITA ya Khelo India Women's League kübok asaya ka kisüing ama 2021 nung tenzük, saka tangbo linük tesem balala nung meta talang nung

aliba district tem nunga leagues tem ayongzük, ta ashi.

Iba sentong nung National Sports Federations, All India Football Federation (AIFF) den Nagaland Football Association ama state bodies temi saisapong aniteta national sapang nung tokteptsüsa anitetba atema pelaba lemsatopa liasü.

Sharma-i asayartem dang yimya tajung nung tasü ita tokteptsü ajungshia liasü.

Iba sentong ya lanur sempet tajung alirtem jangjateta tajungba jenjang nung anitetsü nükjidong nung ASMITA framework kübok Nagaland Football Association-i ayonga liasü.

Iba asayamung tenzükba sentong nung Kiyeka S. Sumi, Senior Vice-President, Nagaland Football Association (NFA) menden liasü, K. Neibou Sekhose, AIFF Executive Committee Member asern Nagaland Football Association tiri pela agizükba o jembu.

Rev. A. Temsu Longkumer, Pastor, NPBC, Chümoukedima ajanga sarasadem aser Kevilehou Sokra-i temeja ken ka aten.

Kevizhakho Suokhrie-i 62 buba WASA Wrestling Meet akok

Kohima, Tsüklai/February 06 (TYO): Khouchiezhie Kohima Local Ground nung Western Angami Youth Organisation (WAYO) ajanga ayongzükba 62 buba Wrestling Meet nung Jotsoma yimtsüing nungi Kevizhakho Suokhrie aser Seyiejalie Gwirie nati mezüngbuba aser tanabuba jenjang nguteta liasü.

Final nung Suokhrie-i Gwirie madak takok ngua senpet sen 1 lakh angu. Gwirie-i senpet sen 60,000 ngua liasü.

Tasembuba aser pezübuba jenjang ya Mezoma yimtsüing

nungi Sielie Chüsi aser Zasevikh Meyatsu nati ngua senpet sen 45,000 aser 30,000 agüja liasü.

Quarter final nung tusker par pezü nem nisung shia sen 5,000 agüja liasü.

Junior category nung Sechü Zubza nungi Thejasezo Sechü-i tematiba aser Metseilhoukho Zhünyü-i tanabuba jenjang ngua liasü. Tena nem senpet sen 10,000 aser 7,000 agütsü.

Khonoma yimtsüing nungi Vimezeto Zinyü aser Vikohelie Khate nem senpet sen 5,000 aser 3,000 agüja liasü.

STATE OSANG :

Tapak 2 nungi...

DAF-i Dr. Ambedkar Scheme indang...

Scheme kübok NITI Aayog indang NGO Portal nung züngoksema aliba NGO tem shirnok tenteter küm ana junogo parnok den UGC mesüra State/Central Government nungeri agizük aliba sorkar aser jurila college, universities aser institute tem senotsü teyari atema apply asütsü asoshi temsüa lir.

Temsüa aliba NGO temi grant-in-aid sen lakh 2 tashi agizüktsü aser sorkar o jurila

rijutemi grant-in-aid sen lakh 5 tashi agizüktsü. Senotsü teyari ya financial year ka nung sentong ka atema agütsütsü.

Teyari agitsü jangraba riju aser lokti tentetemi Dr. Ambedkar Foundation-i agüja aliba application format ajanga apply sütetsü aser iba dak ajemdaker proposal renemtsü. Application form ya Deputy Commissioner, Kohima Office kübok Development Branch-i agütsütsü.

Chozuba yimtsüing nung Rukuseno...

Mezüngbuba dumper yagi tetsür la dak ya atsük aser la iba tesem nung süatok. Kasa mapang nung tanabuba dumper anisang yagi gari anentsü melen mezüngbuba dumper anisang dang ajentsü asoshi ajungshia liasü. Iba inyakyim ajanga tanabuba gari anisang ya-a kasa aitsür.

Yimtsü nung lokti tentet balalai aibelenalirtem anema jenjang tapet agitsü aser

asülaer kinungertem nem ochi obendang agütsütsü takhangba agütsüogo. Yi jemer mekümdangi gari aniba ajanga tai maketba taküm ka laluogo.

Iba den bendenloksema Council-i ken o dak sendaka aliba department dang tarutsü nung iba amala lendong mataloktsü atema rumble strips, road signs, traffic signals, sign tapet enoktsütsü takhangba agütsüogo.

Pilgrim Hr. Sec. School nung NEET-JEE...

Ajay Sethi, Managing Director, NITI Nagaland ajanga kaketshirtem dang mangdang tulu yur pei nükjidong nung bendanga agütsür inyaksü ajungmesoa liasü.

Paisa kaketshir aser tsürabortem dang reju aser School Integrated Program (SIP) nung tamang akaba atema pelaba lemsatop.

NITI Nagaland nungi tesayur Jaydeep Pandit aser Aniket Sahu nati kaketshirtem den Science aser Mathematics nung tamendak dak tajung

yangertsü indang jembia liasü.

Bithungo Kikon, Administrator, Pilgrim Higher Secondary, Dimapur ajanga tepela o jembu, kong kaketshir 200 dak tema den tesayur aser tsürabor 50 dak tema dena liasü.

Sentong nung SIP kübok HSLC tatidang nung Science aser Mathematics nung marks shilem 95 angutsü imla alirtem nem scholarship 100 shilem agütsü, koba Pilgrim Higher Secondary School, Dimapur nung April 1, 2026 nungi tenzüksü lir.

BILEMDANGANG

"Ajak meimang, kar dak tamang kaang, shinga teyirutsü."